

ZION THUSUAK



REVIVAL CHURCH OF GOD (RCG)

Vol. XXV November - December 2021 No. 130



THUPI:

“Ka mit ngei in la hukdamna chu ka mu tai”

Luka 2:30

Editor: Rev. Dr. Khupkam Vaiphei

ZION THUSUAK

Editor:

Rev. Dr. Khupkam Vaiphei

Associate Editors

1. Rev. Liante
2. Rev. Ngulneipau

Contributing Editors:

1. Mr. Kh. Sang Vaiphei
2. Rev. Kailum

Board Members:

1. Upa Mangkam
2. Pro Pastor Lianboi

ADDRESS:

ZION THUSUAK
RCG Head Office
Thangzam Road
Hilltown
Churachandpur
Manipur
India
PO Box: 91

A SUNGAH THU UM TE

	<u>Page No.</u>
1. Editorial	01
2. Hukdampa a piang tai	03 – 05
3. Mihiam te dingah lei a lau um dan	05 – 08
4. Tuhin ama Jesu tawh kilemna siam in a hun lai in	08 – 13
5. Thi kuan bek ah lung awina ngaituan	13 – 15
6. Thepna bang ti zaw ding?	16 – 18
7. Pathian thagau thiangtho Hopina leh sepding ei piak te	18 – 22
8. Thagau ah dimna ga	22 – 24
9. Hun chiasa chanchin chawmkim te	24 – 25
10. The 44 th Gawtangkot Bial Joint kumtawp Khawmpi	26
11. Hetsakna	27
12. Zion Thusuak Megazine Agent	28

Editorial... ✍

Editorial,

Lalpa'n damna te eipiau in Zion thusuak November-December 2021 issue sua kit theita dingah I um thei ziakun eipuitu Pa Pathian chu amasan Pak in um ta hen.



Unau te kum leh tha hung chia zel in tukum 2021 kum le kumtawplam I hung tung pan kit tau in, hun chia sung leh kum chia sung in unau/suapi/ nu leh pa/pi leh pu/lawi leh gual bang zat hem in mual eila liam san tau in, maleh nang leh kei vang taksa dam nalai in Lalpa na te sem thei leh bawl thei in I um teu haw hi ngun deu in la ngai tua kha tam, la la ngaitua khak lo chun, tuni hin thip chet in kigel thak inlang, hun chiasate leh tu la umdan te kikhual thak tiam in, lungmuan na dik chu la nei na em? Muanna kiti hi, adiklo lam tak a mawk muan ziangthei dingin setan melma pa'n le ei piathei in, a ziak chu thupil te 7:22-23, na ah kimu gual in bawngchal in kipak leh muangtak a akitha na ding mun bil pek kawm kawm ah a zawt gual in ihet lo kal in Thagau thina ding lam zuan ah muangtak in ki chia kha thei ahi.

Tulai hun ahin taksa damna dingah kiven leh chitthei a ngai gual in, I Thagau lam damna ding leh suachatna ding thu inle chitthei ten a ngai ma ma ta ahi. Chitthei ding akiti phat le mawk chut ah chut ziangthei ahita pua, lunggel ten a ngai ah, zia lunggelna apat chun kiven theina ding lampi ahung kimu dawk in, akiven thei tak zia kin thil phalo natna te chun a sukha thei lo ahi. Ziagual a chun Thagau lam hukdamna ding lam inle chitthei ah kiven ten a ngai tan ahi. La kiven thiamlo chun gitlona leh سوالنا bangmalo lasak te khan nang hun that ding ahi. Jacob 1: 15 na chun ***“Eima nawp zawng chun chi a hung suang a, gitlona a hun hing dawk sek a, zia gitlona chun a tawp leh thina ei hun tut sek hi.”*** ati ahi. Hiti hin melma pa setan in kihelo hialin unau/suapi/nu

leh pa/pi leh pu/lawi leh gual bang zat hem thina than gawtmun in apui zung zung ahi. Zia thu ahin ki ngaitua thakna nei ah Pathian hukdamna changa, A Thagau thiangtho pawlna changthei dingin Lalpa'n hun malsawm ta hen.Amen.

HUKDAMPA APIANGTAI **CHRISTMAS MESSAGE**

By: Rev.Dr.Khupkam Vaiphei

Bible chang simding: Mathai 1:18-25.

“Jesu Khrista hung pian dan chu ziagual hi ahi. Anu Mari chu Joseph taw kicheng dingah um lai, a kichen ma deu chau ah chun Thagau Thiangtho in ama chu nau a vawpsak hi ti aki he ta. Tichun, a pawsal Joseph chu mi ginum tak a hi ziakin, ama chu mi lakah suk malpho a nuam pua, aguk cha’n haisan ziang di a gua. Jutia a ki ngaitua lai a chun, lalpa Angel hi a mang lam in a kiang in a hung kilak a, Joseph, nang David chapa, Mari hi lauthawng lo hialin kichenpi ta’n. tu a nauvawp hi chu Thagau Thiangtho vawpsak ahi. Ama chun chapa hun nei intin, a min dingin JESU la hun sak di ahi- Ama chun a mite a gitlonau ah pat hun hukdam ding a hi ziakin, ahung tia. Zia thil hi Lalpa’n a zawlneite mang ah a thugente kha a hung guitunna dingah um a hi. Nungak thiangtho chu gai intin, chapa nei intin, ama chu Imanuel kiti di a hi, a ti kha, zia chu, Pathian I kiang un a um hi, tina ahi. Chun, Joseph chu a hung khatlaw phata chun, lalpa Angelin a hil guala chun ama chu a Zi dingin ava pui ta. Ahi ziakin a chapa a piang masa pen chu a hun nei a, ahung navak masia chu a ki pawlpi puai. Chun, a min dingin JESU a sak tai.”

Kum 2000 masanga khawvel ah mihiamte chungah gitlo tatna ala um khalo chu khatvei thu ah kumtuang tatna siam dingin Pathian chapa Jesu Khrista ama ngei hung ki piadawk in mihiam gual ah Nungak Mary sungah hung kizil in khawvel ahin mihiam ah hung piang in, suak gual ah thi tiang ah thu zawm in khawvel ah um mihiam te dingin kumtuang tatna chu khatvei thun ala zo tan ahi. Ama ei hukdampa Lalpa Jesu khrista pianchanpha Christmas nikhua chu imau in hung tung paita dingin a um ta, ziani khua a ding a hin kochuam tin ah mimal

in kising sakna chu I hun nei pan kit tau in, Lalpa Jesu pianchanpha lawm dingah taksa ah iki singsak gual ua hin, Thagau lam inle ama hi eimau ah hung cheng thei dingah kisingsakna kinei thei ta le ka nuam ngei hi. A ziak chu Mihiamte dingah kumtuang tatna ei siampiaktu Lalpa Jesu Khrista hung pian dan kha isui chun, Juda gam ah mitampi lunggel dan a khan Jesu kha mi hausa leh mi lian mi lalte insungah hung piang dingin ala thil un, ziagual ma khan ala ki singsau in ahi, maleh, ama Jesu kha ziagual ah mihiamte kinepna gual in ala piang ta pua, min bangma nan ala gel lo uh mi lungthiang leh mi gin um nungak Mary sungin ala kizil in mihiam in hung kisiam ala hin ahi. Ziagual ma chun apawsal ding inle mi gin um leh mi zaidaw thiam mi mawl tak Tangval Josep kha teldaw ala hikit in ahi. Joseph mi gin um ahina bible ah kimudan in hiti hin ati ahi, ***“Tichun, a pawsal Joseph chu mi ginum tak a hi zia kin, ama chu mi lakah suk mualpho a nuam pua, aguk cha’n haisan ziang di a gua.”v19.*** ti ahi. Mi gin um ahina chu, a Zi dinga kikhamsa Mari Nauvawp ti thu ahet in haisan aguatna hi ahi, ama hi hinkhua thiag ah kimang mi ahi tina ahi. Nang le Mari gin um na gual ah leh Joseph gin um na leh thudikna gual ah la um chun nanga Jesu chu hung cheng intin ama thutak leh hinna chun hun ma pui ta ding ahi, tichun, Christmas le taksa leh Thagau in kimang piting thei ta ding ahi.

Tukum Khristmas dingah kiginna bang gual in la nei em, zia kiginna hi a dik puai ka tina ahi diak puai, Nang leh kei dingah Khrista ahung piandan hetzingna in ahun leh ni vak mat hi diklo hikeilo chu ahi. Ama bo, zia taksa ah ikigin na gual un, Thagau lam inle kiginna leh kisak khawl na alanei theileu hin phana ti ahi. Pathian cha hitheina dingin A Thagau chan/nei ngai ahi zia kin, zia Thagau hung chen theina dingin eimau a hin tit na khat a um a ngai ah, zia titna chu bang dang ahi diak pua, lunggil tak ah, zothei thu pang kei lo ah Ama Jesu Khrista Lal leh Hukdampa dingah kipawm ah, Ama lunglam leh dawilam ah itaksau hi thuzaw ah kimat theina hi ama kipakna leh lungawina ahi. la Taksa, La Lungthim leh la HinnaThagau pumpi in demna bei ah um ding hi

ama dawi leh phatsak ahi. Bible ref: Maathai 22: 37; 1 Thesalonika 5:23

Min Khrista Jesu amudaw phat le alamlui lam in akile kit ngailo ahi ti bible in ei hil chian ta ahi. Mi pil te khan Nausen Jesu amu phat un Leng Herod kianglam ah kile kit ta lo in, Lal thak a mu ta’k ziakun ahung kipatna lam piu lam kha haw ta lo in ala um ziak un Nausen Jesu kha Leng Herod in ala tha lo ahi ref: Mathai 2:12. Zia gual a khan nang inle Lal Jesu la mu daw tak tak ahi chun hun chiasa ah nang ala pui zing diabol kha nusia in lang, lal Thak Jesu nung zui le chun, ama’n nang hun lam kai in hun ma pui ta ding la hi, Ama mapuina nuai ah la um chun, ama kipakna hin tin, nang leh taksa lam thu in bang gual in haksatna tuak in buaina tuak ta ziang le chun le Lal Thak Lal Jesu nang ah a um chun bangkim chu thuk zo in la tin, haksa maleh Khrista’n hun hi nem ding ahi.

Lal thak hung piangpa Lalpa Jesu taw kimu tua thei ah, ama nungzui dik hung chang thei dingin Lalpa’n a thu kigen te hi hun malsawm ta hen. Amen.

MIHIAMTE DINGAH LEI ALAU UM DA’N

Rev.Dr.Khupkam Vaiphei

Bible chang simdi Jacob 3: 1-12

Bible changtel: chang 6.

“Lei hi meisi gual chu ahi, khawvel gitlona bul pen, taksa pum lakah neu pen pakhat hi ngal a, taksa pum hi su buak sek, I pianken nungchang zosia kaksak sek, gawtmun mei ah ei hal kang sek chu ahi.”

Ni khat hi ka bible simlai chu Jacob bung 3 ka hung tun in mihiam te kam ah Lei kimat ding dan Jacob in ala hagen ten hi ka hun mu dawk thak in, ila sim zing ila het zing ala hi ta maleh ziani hin kei ah kipat ka lei ka la mat dan haw kha kaki ngaitua le Pathian lungawina lam ala hikei lo hita ding ahi ti ka hun mudawkl thakin ki ngaituana tam tak ei kawkmu ahi. A ziak chu chang 9-12 na chan kha I sim le hitihin a gen a, ***“Lei ahin Pathian I pau ngei chu ipak ua, zia ma ah hin Pathian melpu ah siam mihiamte hi hansia I law khum kit sek ua, Kam pakhat ah kipat pakna la leh hansia a pawt gel gel sek, ka suapi te haw hiti di hi vang ei puai. Tuinak pakhat ah hin, a thum leh a kha a pawt khawm thei ah a hem? Suapi te haw, theichang kung in Oliv a ga ngai sek ah a hem? Grep gui in le theichang a ga ngai ah a hem? Zia gual ma chun, tui al leh tui chim hi tuinak pakhat a pawt khawm thei puai.”***

Zia bible chang a ka lungthim ei khawi pen khat chu, tuinak khat ah a thum leh a kha pawt khawm thei lo, Tui chim leh Tui nii pawt khawm thei lo ahi gual in ilei hin Pathian ivak pak ah, I chawi hawi ah, ilei ma in thu zakmaw, thusia, hansia, chuleh thuphalo mi dang gensiatnan aki mat hi mat ngailo ding ahi ti aki chian diak ta ahi. Pathian mi , mi Piangthak diktak ten akam un thuzakmaw, thuphalo, thuzo a pawt ngai puau hi ti a dik hi, a ziak chu a kam ua thupha leh thu hawi, thudik ngen a hung pawt thei na chu ama ah um Thagau thiang tho in apui hawi ahi ziak in, Pathian Thagau pui hawi lo mi po po in akam un thupha apawt ngai puai ti hi pawm thiam in taksang mai hitiu. Nang inle la kam ah thuzakmaw, kampau phalo la gen zing lai sia in, nangah Pathian Thagau a cheng puai tina ahi. A diak in ei mau haw limpawl kochuam te lak a pat hin Pathian hawina leh phatna min amu daw zo lo nau hi, Thagau chang ka hi, Thagau mi ka hi kiti ngal ah Thagau mi te um ding dan gual in aki um theilo na hi ahi. Ziagual mite hi Thagau gensia, Thagau dem leh pawmlo te chu nuam leu hin da leu hinle ki chang tho tho ding ahi, Thagau ka gen sia puai lati mai thei , ahinla, la um dan in Pathian Thagau dem mi la hi, a ziak chu nanga Thagau Thiang tho umnuamlo pi ah bangtin Thagau thiang ka nei hi la ti thei

diam? A ma Thagau Thiang demlo hile chun, nangma ah hung um ziang ding ahi. La dem ziak leh la gensiat ziak in hung um thei lo ahi, Thagau Thiang ka ngai hi, ka daw hi tia akam in gen gen henla, alungthim leh ahindan in Pathian lunglam a hi diaklo chun a dem hi tho tho di a hi. Limpawl kochuam ka hi, alim ka hi Thagau chang ka hi ti in ki muang ten ma leu hinle, vaihawmni ahung tun phat le a da masa pen ding le a kap masapen ding te kihi kha ding ahi, ki gelthak tiam hi tiu unaute haw. Zia ka hun gen dan hile la la hiat khial khak dinguh ka nuam puai, a ziak chu Limna leh Lamna, Pauhiatlo ilak ua um hi a dik puai kati na him him hi lo ahi, Halthakna Revival ahung tun hun in Lim hitiu in, kiko hitiu in, Thagau na leh sem hitiu, zia haw chu Pathian thu taw a kikal na le a um diak lo ahi, pha le ka sa, pawm le ka pawm ahi. Ahinla zia guala Thagau thiang pawlna chang ten Thagau thiang in ahun nutsia sek ding in um puai tiu, Pathian Thagau lunglam leh dawilam in hinkhua kimang hitiu ka ti ahi, Van mite gual in nasemlo, nek hawlo, kilaw lo in mawk um in um hitiu in nitum tum in lim in lam lam ziang hitiu ti ah ka gen na lawm le ahi diak puai. Pathian Thagau lunglam ah la um chun, la Lei in thupha pawt intin, Pathian chungah kipakna leh chawihawina bep hung pawt ta ding ahi. Lei hi taksa ah dingin lau umtak khat ahina chu, ama hin thina lam in apui thei ahi, Jesu mat in a um lai ah Peter in aguk in anung aju ah, meilum awi in a um zing lai in, mi khat in nang hile Jesu nungzui hilo maw atile, Peter in Jesu kua ahi ka he kha puai ati vang in, akiang in la paudan hinle ama nungjui la hi hiam alati ahi (Mathai 26:73) Paudan, awsua dan hinle, Jesu nungzui, Thagaumi hi akilat ngai ahi.

Lawng liantak, Gari liantak tak te haw hi ahekna neucha khat in apui kawi lum let zaw ahi gual in, mihiam te hile itaksa pumpi hi ilei neucha hin hinna leh thina khat zawk zawk in a nawp le ei pui lut thei ahi ti a ki chian ta ahi. Unaute Jesu'n khawvel ah a lenlai in, Pharisai te leh Dan lam ah mithiam te kaingin hiti hin ala tia, "Zia mite hin akam un ei chawi hawi un a lungthim un ei gam lat ui" ati ahi. Mathai 15:8.

I Pathian Paknau leh I chawinaw Kam leh Lei hi zothei genna leh thuphalo ah mi gensiatnan mangkit ta lo in, Pathian lunglam tak in Ama pakna leh chawinan mang zing thei ah, Kam ah pat thupawt te zosia ala ngaitha te dingah damna leh kipakna a chan ah Pathian lopi zia genlang zing thei ta ding in Lalpa'n a thu kigen te hi hun malsawm ta hen. Amen.

TUHI'N AMA JESU TAWH KILEMNA SIAM IN A HUNLAI IN

By: Rev. Dr. Khupkam Vaiphei

Pathian Thagau apat thu hung tun dungzui in, ni 21 (hapta thum) An ngawl pauchapna nei ding ah thupiak ka chan ni 17th Sept. 2015, Ningani apat bangtik hun ah ka mat ding ka gel thei ta pua, haksa le kasa, hiti chun, zia nikhua chu manglo in ka um um ziang ta, Mission sung le kei insung in zia 21 sukmang ding chu thil hithei ding gual in ka gel ta pua, 2015 sung in mangthei talo ding in ka um ta. Maleh nikhat hi Makhan Prayer Centre apat nasemte lakah khat chun 'tu kum 2015 sung ah la nei lo chun la chung in thilpha tunglo ding a hi' ei hun ti ta, keile ka beidawng ta. Nikhat hi kei uh inkuan kihona ka nei tau a, ka chate'n le an ngawl pauchap ding chu va mang ding in ei dawisak tau ah, kenle Lalgam ah kasep khawm pi te kiang in pauchap na'n ei heu in, kei hi Mission sung nasepna nusia vak ah ni 21 sung Makhan ah ka va umding hi Pathian thu a hi tak tak nam ei dawt piu in tin message ka pia sau sau ta. Ka ngaituana khel in Upa. Th. Lalcha, Vice-Moderator RCG in zingkal matak 5:00 a.m. vel in ei hun phone ta (26-11-2015), Pastor pa, "ka manglam tawbang in, luigal lam in vâk khat a um in zia chu nang chia na ding dan in ei hil in, ka gel leh tu chung ah an ngawl pauchap ah la chia ding hi Lalpa Pathian in a guat chu hi ngei in'a, chia ding in um ta'n" ei hun ti ta. Keile thu dang gel talo in Makhan Prayer Centre lam zuan in 26-11-2015 ni'n ka chia tai. Date

26th November 2015 nitak in ka tunga, 27th November 2015 ni'n ka kipan ngal tai. (27th, Nov-17th, Dec.2015). Amasan ni nga (5 days) dry ding ei tiu a, zia chu mâi cha le phiat lo ding, tui neucha leh thil dang dang neukhat le val khak lo ding ti na a hia, ahinla ni li (4) tin ni date 30-11-2015 ni'n ka gil kial bek set ziakin amau zawlneite hetlo ding in a gukin kawlthei (puntuan) min ga pani, inn tawm lam ah ka va lo tha, ken le ka ne ngal a, insung ka hung lut leh zawlneinu a hung lut in bang ahem la nek ei hun tia kenle, kilepna in puntuan na jikdawng ka sung a nawp puan ka nek a hi ka tia. Aman thakhat in la dik ta puai, a khawk ngei hi Pathian kiang in thupha gen hitiu in, nitaklam le a hitak zia in, thingpi leh nekthei nang a ding siam hi tiu in ne ngal ta'n ei tiu ah, ka zak a cha ma ma ziang a, gucha kiman dawkh khu tawh a ki batlo na a um pua, "la hiat thiamlo ziakin la bawl khial a hi Pathian in ngaidam na'n ah" ei tiu ah. Ei sulungmuang dan in a ki kawiu a, a hinla ken chu nuam kasa ta pua, hetlo ah thil bawl la ka hi pua, mi mulona a gukah thil bawl zaw ka la hi ziakin. Tichun, ni nga leh ni sagi sungin (1-3-12-15) ki ngaituana nasatak a hung tungah, zan ni lam hi imu theilo in ka um ta, zan khat hi Bible chang hung ki gen gen in a um ta, vak thaw ah sim ding chule ka pei pua ka taksa a chau zia in, male a vel vel in a hung gen ah ka hiat zia in, keile ka lel pum pum in ka hung tho in, zia Bible chang chu ka phet dawkh ah ka sim ta. (Matthai 6:1-6) Pharisaite gual ah mi mitmu mai ah naphasem, Pathian mitmu ah diklo tamtak kibawl a um hi, ti a hung hi ta. Keima'n a guk ah puntuan ka nek, min ei mu lo ding ka tia, himaleh, Pathian in ei mizing a, a pet pet in ei sulang ta, kiselna zia a umchuam thei ta pua, zia jachatna leh mualphona kha ni tawp ni ah vaihawmna ni hitaleh thiamchanna him nei talo ding, gawtmun lam zawt ding ka malam a hi dante thu tamtak ei mu sakin, Pathian kiang in kisik leh thuphachawi na'n hun ka mang ta. Tichun, Lalpa'n ei ngaidamna aw te ei hiatsak in, kakipak in, ka tha a hung muang thak in gilkiang dangchakna zia le hetalo in, lim takin ka hunte chu ka mang zawm jel ta a hi.

Taksa duchakna sukpitin ding ka guat zia in Lalpa'n khatvei chu ei hi mualpho ta, kei dingin warning (hillawkn) thu dan in ei hil

ta. Tisa nawpna sukpitin ding guat ziak in, Pathian Thagau Thiangtho chu tawh kituaklo kikal ka hi dan Paul in Galatia 5:16-18, 24 na'n kichian takin ei hil a, la tisa nawp nau chu Thagau in that hen ei ti a hi Galatia 2:20; Romte 13:14. Khrista ah kithuam in taksa utna umte suk pitinna dinga bangma bawl lo in um thei hi tiu ei ti te hi kei a ding in a hung thak ta, Pauchapna nei ah Pathian tawh kipawl nawpdan ka hun he dawk thak kitta. Sam 4:4 na ah David in kicha unla, thil hikhial ki un, la jalkhun laizawl chung un la lunggil tak un kingaitua unla, thip chil chel un a ti Bible chang gual in, ka kingaitua ahileh, Lalpa lungthim natna leh Lalpa Pathian dawilo gual ah ka hinna, ka lungthim leh ka taksa a la kimatnate haw a vel in, a ban ban in eimu sak ta. Zia haw ziak a chun, Lalpa hepina ka chan dan ei mu sak in, zia Pathian hepina chu ka kiang in, ka lunggil ngaituana hin a hung dim ta, Khrista hepina in kua ma muda lo ah hepi ding dan ei hun musak in ken le zia chu nei in ka ki hengal ta. Ka maban hinkhua ding chu ka gel in ka lim deu deu in ka tha a nuam ma ma ziang ta.

David in Sam 139:1-24 sungah a gen te a hung kilang in, “Lalpa la ang apat khawi kisel thei ding ka hem? Nang in lei um kimvel ngalah”, a tite gual in ka umna mun zosian Lalpa ka kiang ah um in ka mu ta, ka lunggel ka ngaituana zosia le a hiei ti hetsa himaleh a thak in ka hun heta, ka lunggel leh ngaituanate le a hung thiang in, taksa lam thil him him ka ngaitua thei ta puai, Hallelujah, Amen.

Tisa lam nawpna a kiti phat tak leh mi tampi'n i gen pen chu numei leh pawsal kipawl na le sum leh pai ah nawpsakna bep hi tawh a kigen sek in, amabo tisa nawpna a ti hin a huapte chu zia te ni bep chu hilo in, mudana, lungnatna, thangsiatna, thangtawmna, ginmawna, kinakna, gukchakna, zudawn, beri chep, kuwa nek, khaini nek, kizo bawl na, lepgukna, migensiatte, mi demnate, mi musitna, mit ah et nawpna, chuleh thatdanate haw zosia hile tisa nawpna/taksa nawpna chu a hi. Zia haw taksa nawpna te haw hi la nei a, la suk pitin chun, nangma ah Thagau Thiangtho kha lungngai in a taisan ta ding ahi. Pathian Thagau Thangtho a chen zing lai in kuama'n zia a chung ah

taksa nawp nate hi a bawl ngai puau in bawl nawp na le nei ta maleu Thagau in a sumit zo thei in, dikna hinkhua thiang in a khawsa thei bep ahi. Pathian in keima ka thiantho gual in nangmau le thiangtho un ei ti a hin, Thiampu bu 11:44-45, 1 Peter 1:15-16, Heb 10:22, 2 Kor 7:1. Thiantho ding a ti hi nek leh dawn lam thu bep hilo in, i khawsak na le i umdan tiang in a huap a hi. Zia bep chule hilo, a chung ah taksa/tisa nawpnate'n a huap zosia khale pang vek a hi. A ziak chu van gam a hi'n ziagual ah thianglo kihi buak te chu lut lo ding a hi. 1 Kor 6:9-10, Marka 7:21-23, Thupuan 21:8.

Jesu'n khawvel ahin melma nei ding i hi dan uh nungzuite kiangin a la gen ta, ziagual a chun Eden huan apat in Pathian, melma chun mihiamte hi ala pui mang in, gitlo a chansak sek ahi. Zia melma chu kidopi ding ah ama thumang ding in Pathian in ei kawi chiat a hi. Khawvel ah melma pa i hun zawlo sek nau hi, i thiantho lo ziak uhleh, taksa nawpna suk pitin guatna hin ahi Thagau ah i hin zaw lo nau hi. Melma pa hi banggual ah kidopi ding, ama hi bang ahi em ti hiat daw a ngai hi. Zia melmapa i kidopiu chu Sawlchak Paul in Ephesa mite kiangin hiti hin a la gen ahi. I ki dopiu hi taksa leh thisan a hi puai hile chu ei le i pan thei dan dan ah pang in melma pa chu zo ngei ding i hui, ama vang a hi lo ziak in i kidopiteu hi lalnate, thuneinate le vanlaizawl ah thagau phalote leh khawvel thimchung ah vaihawmtu te tawh a hi ei ti a hi. Zia hin chapona, dik kisakna, thunei kisakna leh mudanate hin a huap khawm a hi.

Kihepi leh kilungsiat tak ah chengkhawm, semkhawm ding ah Pathian in ei thupiak lai in, kimudana leh kinakna a hung pian sek hi a ziak la he chian em? hechian le chun kuama muda puan la tin, kuama tawh kina thei kei puan la, mi mudana leh kinakna a hun um daw sek na hi eima dik kisak na leh thiam kichan na ziak a hi pen hi. Mi pani hung kinak sek na hi, khat in aman a chuti gen le kenle gen ding ka he, dik a kisak leh keile ka dik hi kitina hin a hi. Zia kiti tua theina hi a um ding him a hi, a gente le ka awi maw puai, a ziak chu melmapa Setan in amau dikna gel leh thiamna gel ngawn a musak dungjui un a gen a

hi. Hiti chun keile melmapa Setan in ka thiamna leh ka dikna ngawn ei musak lai in kuama hi pha ka sa pua, dik kasa puan, amau haw awi mawna leh thiammawna ngawn ka gen sek in, zia gual lunggel leh thugen ka nei zia in amau haw chu ka mu da deu deu in, a tawpin kinakna ka hun siam dawk in, amau tawh kigamla tak in, hun sawt tak ka um tau ahi. ‘Maleh Pathian hepina thu ka kiangin a hung tun tak tak phat in, keima diklona leh thiammawmate ngawn ei hun musak in, tichun, amau dikna leh thiam nate ngawn bep ei hun musak kit phat in, thiammaw ka ki chan in, amau chu lungsiatna mel in ei musak in, ho nuam lo leh muda te kha ka mu nuam ten ten in, ka ho nuam ten ten ta a hi. Tichun, zia gual ngaituana hung um chu a takah sep daw a hung hi thei phat in, ka chung a jâng in ka kipakin, ka thamuang ma ma hi. Melma pan vang nuisan leh japi in kaw i ei gua, zia thu a chun mi ei nuisan leh ei japi dinglam le ka gel pha ta puai. Aziak chu Paul in, “Zia lungthim Jesu Khrista ah um kha nangmau ah le um ta hen” a tigual in Khrista lungthim chu ka hun paw ta ahi. Lopina Lalpa chang ta hen, Philipi 2:5-9. Khrista khan jachatna ngainep in kingainiam takin Pathian thu a zawp ahi. Midang ngaidamna leh hepina bep in Lalpa tawh ei kivawpsak in, ei kihosak thei bep hi, Bible in la mu zing la suapi bawn la hepi lo chun la mukhak lo Pathian chu ka hepii la ti chu zo thu a hi a ti ahi.... Kuale hepina neilo chun Pathian chu a hepuai, Pathian chu hepina a hi zia in, 1John 4:8. Hepina neilo te chu Pathian helote a hui a ti hi a dik ma ma ah, aziakchu mi muda neite le kinak sawmte hi Pathian helote a hui ahi. Paul in Pathian helote khawsak gual in khawsa lo in a ti hi a dik ahi. Hepina hin a invengte siatna ding bangma a bawl ngai pua, Romte 13:10. Hepina neite chu a nunnem ah, a itsikpua, a kisuang ngai pua, a thuak ngap hi 1 Kor13:4.

Zawnei Amos in, “Aw Israel la Pathian tuak dingin kisa zo in” ati hi (4:12) hetchiat ah kingaitua chiat ding pha ka sai, la Pathian tawh kituak dingin kikawi le chun, a ang ah banggual in la ding diam ti chu hethei tan la. Paul in Rom mite kiang in khup zosia ka ang ah dil sun tiu in, lei zosia’n hung kipuang ding ahiu ati ahi, Rom 14:11; Isaiah

45:23; Philippi 3:10-11. Zia hi zawlnei Isaiah in a la gensa a hun pau me a hi, Paul in Pathian ang ah la chanchin chu gending hita le chun Jesu'n a dinpi thei na diam? Jesu'n a dinpi te chu Pa ang in thiam chang ding a hui. Tu hun in ama Jesu la zo bawl khak chun jing ni (la thi ni) leh vangsiatna tuak khan la ki ngaitua pha'n suapi, Jesu bep hi ei hukdamthei a hia, ama Jesu bep hi kumtuang zawtna lampi a hi. I gualpha pen Jesu a hi ti la phuak tun a sak gual in Jesu bep hi gualpha'n nei in, ama bep tawh kivawp leu hen, aman i lampi ding ei hil in tin genthei leh vangsiat i kisak lai inle aman ei umpi intin, kipakna i tuak lai inle lopina ama chang zel ding a hi. Tuhin ama tawh la kilemlo ua ahi le, thi nung tak leh vang kilemna ding hun um talo ding ahi. Tu hi hun kipak um leh hukdamna ni a hi ti Pauli'n a gen hi taksang in zui hitiu dan leh kisik lo na ding in. Lalpa'n a thu malzawl ta hen. Amen.

“THIKUAN BEK AH LUNGAWINA NGAITUAN”

By: Pro.Pastor St. Lianboi

Text : Eccl. 12:1; 1.Timo. 4:6-8

THUMAPUI

Hiatman lo ah thakhat ah thi le chun la lung awi lo maithei ahi. Mihiam a ding in khawvel hi, lungkim lona, lungawi umlona gam ahi, maleh, thi ding kuan tiang bek ah lung awi theina pen chu danglamna, kisiam phatna leh Khrista nei hi ahipen mai hi.

A. MIHIAM HINKHUA TEPSA (Fixed) HAW:

1. I pian ma I nu gilpi sung apat eisiam tupsa itau in, damsung ni ding le ei guatsa ahia, zia haw Zosia hi lekha bei a ziklut sa ahi tin Psalms David pakna la'n I muu ahi. (Psalms 139: 1-16)

Chuleh, I lunggel leh I ngaituana Zosia le a he suak vek ahi. (Psalms 139:1-2)

2. Pathian in, mihiam damsung ni ding chu a guat lawk sa ahi tin, Job in ei gen piak hi, tha bangzat I dam ding uh le ei tep piak ahi tin, Job lekhabu imuu hi.
3. Hebrews ziktu ngei inle, mihing a ding in khatvei thi guat sa ahi a ti piak in, I chungthu ngei le tan piak leh vaihawm piak ding ah umsa ahi tin, Hebrews lekhabu in ei gen piak ahi. (Heb. 9:27)

Thi nung a le I tunna ding, I chia na ding guat sa ahi, zia chu, Da-mun or Vangam, khat zawk zawk hi ding ahi, thi ding kuan bek ah lungawina chu khawi zawk ahem? Vangam/Da-mun kingaitua phat ahi tai.

Suapite haw, Pathian ang ah kuama a zam thei puai ti hi, I hiat chiat ding uh ka daw hi, a zia chu, I pian ma thil bangkim I chan ding ei guat piak sa ahi tai. Etsakna: Jonah le a zammang thei puai.

B. THI KUAN AH, LUNGAWI DIAKLOTE:

1. Israel Leng, Solomon hi, a haupen, a chingpen, a minthangpen, zi tam nei pen, 1,000 nei ahin, Leng himaleh, a thi kuan tiang inle, kipakna a nei puai, ka lungawi hi, ka lungdam hi a ti kha puan, thil Zosia hi Pathian panglo in panna bei ahi a ti zaw ahi.

2. Luke 12:20-21. Ama a ding bep ah go khawlkhawm a, Pathian lam ah khawl lo, hausalo chu, a hinna lakmang ahi ding ziak in, thi kuan tiang in a lungawi thei puan a kipak thei puai.

Mi hausa pa khale, achiasa a hinkhua a gel leh a lungawi thei puai, mithi khua a umsung a khan le a lungawi thei puai. A suapi pawsal nga (5) haw, nung a ding ahinkhuau ding uh a gel piak leh lungawina anei thei puai, mi hausa tak, gam leh gua lianpi nei, suak tampi nei in, nuam tak in, um maleh mi thi khua a tun in a lung awi diak puai.

Leisiat chung ah bangma cha hilo haw, a thupi dan ahe dawk in, ahivang in, bawlfhat na ding phat anei taklo ziak in, a lung awi thei ta puai. (Luke 16:19-31).

ACHAINA: Paul hinkhua vak en hitiu, nei leh go bangma tam neilo, zi le neilo, Inn leh lo le buai pi lo, Pathian a ding ah gentheina tampi thuak in, an leh tui ne manlo khawp ah um maleh, a thikuan a chun ahikhua a chiasa haw anung et leh, a lungawi in akipak ahi, ei uh le I nu sung apat gilo sa hung piang ma leu hen le, I thikuan bek un, lungawina, kipakna I nei theina ding un, kisiam pha'n Lalpa bel tai tiu

Lalpa'n a thu ei malsawm ta hen

THEPNA BANGTI ZAW DING?

*By: Upa S. Haulal Vaiphei
Moderator RCG*

Pathian in amite a ding ah a lungtup lianpen chu zawna chan tei tei ding ti ahi. Ahinla zia na hin hiat di chu kidona umlo vin zawna um theilo ahi, Martin Luther in zia gual ahin thepna hi Lalpa lam ah ka hotu khat ahi atii. John Wycliffe in zia gual ahin ala tekhn hi, mual chu banggual ah sang maleh zia sang a chun hui chu a sang zaw kit hi.

Thepna hi um matchet leh Christian te buaina lianpen ahi zia hi suktawm thei ahi puai. Christian te lak ahin mi tawmcha bep ettawn thei a um sek in zawna chang. Ahin gitlo I bawl phat uleh kilep daw na ding in mi ahiloleh thil dang I ngaw sek ui. Zia apat ahin imu chu ahileh nisin ah mi tamtak thepna zaw ah ki um sek ahi. Adam thep ah a um na tawh Jesu thep ah a um nau teni apat zildi (Genesis 2,3 and Matthew 4)

1. Amun leh gam ngaw lo di.

Jesu gamthip ah thep ah a um khan bangma thil hing nek leh chak ding bangma a umlo ahi leivui nelleh suang tilo vin, alang khat lam ah Adam thep thak ah a um na kha vak en hitiu bangma akivat umlo ahi, nekthei ding thei chitin leh bangkim a hawina Zosia dim huan sung ah um ahin, maleh zaw in a um hi. Pathian in ei daw chu ahileh thepna ki zawsak lo di, gentheina mun hihen lang nopsakna mun hileh, kivat umlo leh akivat tun tun in I um lai in le zawna chang din Lalpa'n ei daw hi.

I puu, apostle Paul in aki ko pi kha, Khrista hepina pat bang in ei khen zo diam? Kidona ahem, lunggimna apat ahem, kial in ahem, sillo chenlo na ahem, tite ahin ei khen zo ding ala tia, ziate bep le hilo in, thina ahem leh hinna ahem Khrista hepina apat ei khen zo ding a ti

kha. (Rom. 8:35-39) chan hi. tuni nang leh kei vang Khrista hepina tawh bang in ei khen tam? Khrista hepina tawh ei khentu chu Khawvel thuneitu ahem, ahiloleh van lam thil te apat ahem, zia Bible chang a pat hin ki ngai tua tia la din mun chu dik kisa ngal ah diklo, ting kisa ngal ah tinglo, puitu pang ngal ah Pilat tawh bang khut sawp maimai, thiang kisa ki hi khana. Ki etchian ahun hi unaute haw, eima dawi dan dan in thepna kipuk zaw sep ahi.

2. Kipawl khawmna/Mission ngaw diak kin.

Jesu kha kuama tawh aki tawn diak pua, aki gawp diak puai. Thep in a um a khan ama ngen in a do angai ahi kha, a langkhat lam ah Adam kha aki vawppi ding Evi akilawipi ding anei ah, thepna do na ding in apanpi ding leh aki vawppi ding ahia maleh a zawlo ahi tau. Zia gual a chun thepna hi mi tawh aki vawp pet leh khawmpi sung leh a dang dang ah hung tung puan tin ti hiat a kul ahi. Tulai Khrstian kikhawp haisan kinung tawl akitam tan amau lah ki hiat lo ki khawmna pan lo hi lemchang a mang in a kipuk zo ta ahi. Ki ngaitua hitiu unaute khawitak din mun la ding tam? Kipawl na leh kikhawmna hi thahat na khat chu ahi nai maleh thepna I tuak phat leh I chang ah I thawk zel di hung hi sek ahi. Pathian thu ah (Rom 14:12) kuaman eima chanchin ei hiat piak lo di ti zia hin a ki mu chian hi eimau in I gel dan un I nu ipan ei he thiam leh I ti in leh inau ten ei hiatpi leh itisek, maleh thepna chu ichang ah imaw puak na I do di a hi sek hi. kuama kithuapi di umlo lai leh ki vawppi pha umlo lai in chitthei di ahi. Themtu in ei la zaw tak ahi khak ding lau um ahi. Pathian chate apat I zil uh chu ahileh I chang ah I um lai in thepna do dan ahi. Joshep kha kawkhuk sung ah a chang ah um pet in leh leng insung ah leh suangkul sung in le thepna kha a chang in a do zo pek ahi kha. Pathian tawh um khawm in.

Thepna tuak lai in pumpel ding I guat ding ahi pua, zaw ding ahi zawi. Pastor, Rev. Evan. leh upa ten ei panpi ding ahipua ei ma man pan lak ah zaw ah I taksa zawngkhalna vang kipanpi ding ahi. I tuak I din mun kipakna hihenla, dana hileh I nawp dan dan ah ki um

theilo ding ahi. Zia tak ahin, chantawk ah lungawina hi a phapen ahi. (1.Timo. 6:6) I hinkhua I tuak ding ah thep na atak tak a pat zam mang theilo ding ihiu. Pathian hepina apat chau leh ki nungtawl la hi leh gam mang la hi chun Rom. 11:22 a gen hi lau um tak ahi unaute sathak hi khan la....

To be continue...

PATHIAN THAGAU THIANGTHO HOPINA LEH SEP DING EI PIAK TE

By: *Upa Th. Lalcha
Kangvai*

Ahun leh ni: 23/10/2021 (Kiginni) 3:00PM

Ziani zingkal lam dak 3 in chunglam apat awgit khat in ei hun ho ah, Ka Belampu Lalcha, ti in ei hun ko ah, hawideu in ka ngai leh awgit chu hun khat khat leh ei hosek pa awgit ahi ti ka hiat phat in, Lalpa lupna chung ka lum hi tin ka dawnhu leh tho inla ka thu hun gen te leh lasep dingte hun gen ding ka hi ati phat in, keima le ka lupna apat ka tho ah, ka ki chu ka pauchap leh ei hun ho kit ah, la sep ding dan te hun hil ing ka, ala ngai phan,

1. Kangvai RCG kochuam te tawh ka ki ho sek nau mun un dak 3 chet leh lamapui ah, lei ho diu ahi. Kochuam te le apan ding un hiatsak in, la thupi ding chu "*ka mite hin lei hiatmil nau a sawttai khawi gam tung zo ahi tau em?*" aki hiat dawna ding un va zilti in ahun tia Bible chang ei piak chu, **Thupuan 2:1-7**

2. T.Munjang lam in chiau la, Ka miten ei ho na mai ua tepte na ka kawi te a sia zo tai. Va hi pha kit un zia na thupi la mat ding u chu, **Zeremiah 33:1-7**, hi ding ahi.
3. T.Munjang lam Daimun ah, teptena leh hiat zing ding ka kawi sawn 3(pathum) a um in, zia mun a chun keima tawh kihona nei hitiu, zia mun ah thupi ka hun piak chu **Sam 34:1-10** ahi.

Zia nasem ding a chun, zia hun lai ah a kiang ah hiatsak na ka piak pa kha a pan ding **(1) Pa Zoliansiam, (2) Pastor Pauneu te nupan, mi 5 (panga)** la tin ding uh ahi ahun ti phat in, kenle Lalpa la thu ka nial na ahi puai, keima hi langbai ka hi ta hila ka ti leh, mi khat pha lasak pen khat gen le chun nial lo in hun zui ngal ding ahi, ama chu kei ma ei ngai mi ahi ngal in ahun ti kit ah, zia ka thu gen te hi hun sawt dang lo ah la sep ding ahin, zia na hi lasep zaw zaw leh thu khat hun pawt intin, zia chu lau lo ah la din pi diu ahi, zia thu ki gen te hi ngaisaklo leh ngai da a um uh chun, amau haw chu keima ahun hosek, la Pathian thil bangkim bawlthei pa hin ka ngaitua ding ahin, nang uh buai pi a ngai puai.

PATHIAN THUPIAK GUAL TAK MAI IN

Dated 24/10/21: Pathianni nitak dak 3:00pm chet in Upa Kailiando tawh khuang leh Labu chawi in Daimun ka zuan ua, midangte a hung vaigei deu zia k un upa pa tawh ka panu in 3:00pm chet in pauchapna ka la mang ua, mi dangte ahungtun phat un 3:30pm in hun aki pan ah, Pathian ei hiatsak thu te chu gen lang in, **Thupuan 2:1-7** sim in pauchap khawm na mat ahia, a tawp in **HALLELUJAH 3VEI** sam in Lal biak na hun suk tawp ahi tai.

Dated 25/10/21: Seppatni hin Pathian thupiak chu zui in, zia hun mang ding a chun Pastor Pauneu leh anuu Nu Hatlhing ka phone leh amani ngei le thupha lo in, Lamka a umnau apat ahungsuk ua, *Pathian in tepte thil bawl ding ah ahiatsak pa ahileh vang suty muthei puang ka nang un ala bawl tau in tin ei nial phat in*, kenle, chu tia Pathian thupiak la

taksan lo ah la ngaisak lo leh Pathian tawh ki ho tau in keiman maw ka paw thei ta puai ti in ka nusia ah, ka tu nu Nk. Lamnunsiam ka kipui ah, damlo pauchapna nei piak ding ah ei ngai na ei ko a um zia un, zia na chun ka pu chan un maicham siamna ka nei piu ah. Zia ei ko nu, Nu Kamkim kum - 78 mi ahi, amau in ah chun zing an ne den in, nitak lam hunbi ngak in T.Munjang in ka um den ua 2:00PM ahung git phat in Pathian in ei thu vaithak na ka hun gel dawh ah, kei le ka umna mun apat chun ka kipan dawh ah, Torbung a cheng RCG Upa khuallawm te in ka zuan ah, anuu, Nu Lily upanu, inn kiang tho nam ah kisala ma ma, akiang a chun ka gen leh ama ngei le thu pha kei lo in avan a khel ah, alukawp a ki lak ah, ho in mun a chun Pastor pa te tawh ka ki mutuau ah, Thupiak gual in Bible chang hung kipia chu **Zeremiah 33:1-7**, Pastor Pauneu in sim dawh in, pauchapna aki nei in, Diallap a ki phu thak kit in, Damna cross pen vang a ki tung ta puai. A chainan **HALLELUIJAH THUMVEI** sap zaw in Lal biakna hun suk tawp ahi tai.

3:30pm in T.Munjang Daimun ka zuan ua, ziana a chun tepte na suang 2 leh cross khat phung a chun thupi ding hung tung **Sam 34:1-10** Pastor pan sim dok in pauchapna aki nei zaw in **HALLELUIJAH thumvei** sap zo in Lal biakna hun chai ahi tai.

Nitak lup kuan in zia thu te chu Pathian kiang ah tut in ka Pauchap leh zan ah manglam in ka kiang in puanvam ah kivan mi 2 ahung ding ua, ka changlam leh ka veilam in thu khat ei gen piak ua, "**lau kin, Lalpa ah kinga, ama ho zingte chu Van sawlchak ten umpi lo ding ah la gingcha ahem**" ti thu a gen zaw un ei nusiau ah, keile ka hung khanglo ah, amite chu ka etvel leh ka mu ta puai.

**Dated 1/11/21 MONDAY PATHIAN HOPINA
AHUN: 1:00AM**

Zankhang lai tak in Pathian Thagau Thiangtho hopina ahung tung ah, **"Tho inla Kangvai Biak-inn mun ah hawmzakna suang phung lam**

in la khuangneu kichawi inla, thumvei vel inla, keiman Pakna La ka hun piak te hi san lah pauchapna 3vei vanei in a tawpna pen chu kei lei ho nau insung hi ding ahi, ziana a chun lasep leh la bawl dingte hun hil ding ka hi” ti in sawlna ahung um ah, dawtna ei nei ah, keima ahun ho pa hi lei hia em? Ahun tia, *‘kenle Lalpa ei ho zing sek ka Pathian la hi ti ka hia chian hi. Ngaitia, Lalpa nangma kiang ah pauchap ding ah ka hung pi sek in pialgal ei kilawi san ta, ka chang sek ah thawmhau lo ding ka hem’* tin nial na ka siam leh ka kiang apat in apantitu ding hun sawl ding ka hi chiamai in ahun ti kit phat in, thudawt ka nei kit ah, Lalpa bang dang ka ken be diam? Ka ti kit leh, *‘nang uh a ding ah teptena ka piak te khat ken be in’* ahun ti kit phat in ka lupna pat ka tho dawk ah kavan ka ki van ah khuangneu ka la ka ki hei leh ka Bible sakhau ka mu zia hi phapen in ah tin ka ki kua ah, ka kipan dawk ta, Hawmzak na suang ka phak ding kuan in ka vak et leh amun tuam chu vak sing seng in ka mu, ka tun leh tunlo in La khat ahung ngal ah, zia La chu, **“Aw ei hepi Pathian in I lungthim sung uh hin”** 4th Edition No. 434 Ka tun in ka sa pan ah suang ki tiang leh Cross ki phute chu Lasak kawm in velthum ka vel ah, ka sak zo in khatvei pauchapna ka nei tai. Ka pauchap hun sung a chun, La khat ahung tung kit ah, **“Aw Hallelujah Lalpa lopi pen”** L.T.T.No.258 Nivei ka pauchap hun sung ma a chun La khat ahung kit ah, Pastor Thangneikhup la phuak- **“Ka kumtuang Inn ding lem tang ka”** LTT.No. 439 Zia La chu sakit in, Pathian ho na Innsung ka zawt leh kawt chabi ala kikam zia in ka luthei tapua, kawtbul in a thumvei na pauchapna ka nei leh kasep dingte ei hun hil tai. En in, it hu kitak khu ahun tia, ka et leh Adum ki nu pek chung ahin –

3. Cross lim a san kinu a um ah a chung ah chun rong kang ah kiziak, **1.Kor. 2:2, 1.Kor. 1:18**
4. Cross changlam pang a chun Diallap khat aki tung ah, diallap chung a chun, pau chithum in zia ding ahi.
1. Chia zing hitiu aw zion chate

2. English pau
3. Manipuri pau hi ding ahi. Zia diagram chu ka Belampu gin um Upa Kailiando chapa Tv. Boisawn lava ziksak ding ahi.

Mipiten atak san it hu ding un, lamel latsak in a ti zo in, zia ei ho pa chun ei nusia ah aw le a thip tai. **Halleluijah, Halleluijah Amen.**

THAGAU AH DIMNA GA

Upa Lalboi, Gotangkot

Thagau ah dimna ga Chu nun hindan thiangtho, Sual lak apat kikoi dok chuam, Pathian apat pot hepina dim nun Chu ahi, Hukdamna chenpitu jiaka hukdawna chenpitu. thagau thiangtho jala hukdawna ahi jawi, Khrista Jesu hinna thagau dan chun sualna Leh thina dan lak akipat chun eipot dawsak tangal ah, (Rom8:2)chutichun thagau thiangtho chun sual kanna lak apat ahukdok sek hi, " la hatlou na chun atha suak tai (Lk 13:12) Lazar khale hung hing Jiang maleh kan in aum tho hi phel unla chiasak in" (Jn11:44) Nangle keile hile phel daw angai ahi, Thagau thiangtho bep in Jia gual thilmak hi abawl thei hi, (Eze 36:26) na chun Pathian in Israel te kianga lungthim thak pe d Kahi tin,

1) LUNGTHIM DIK LEH THIANGTHO,

AW Pathian keima hin lungthim thiangtho siam inla (Ps 51:10) Thinlung hi thil jouse Sangin ase pen ahi, (Jer 17:9) David khan thinlung thiangtho anei ta ahi, Lunggil ah thiangtho te chu anau avak hi, Pathian amu ding jiak in (Mt5:8)

2) THINLUNG GENTHEI LEH KISIK

AW Pathian thinlung thasia Leh KISIK ngawi2 hi musit puanla, (Ps 51:17) Lungthim hi atui thak Jiang masang sia eima ahin Pathian in na asem tak2 thei puai, Lungthim nem Leh kithu nun bai ka NEI angai hi , Jia gual lungthim Chu ka neilou chun lau umna din mun a ding Kahi, Lalpa chun

lungthim kingai tawm Leh KISIK mi Chu anai hi , lungthim ah KISIK tapo Chu ahukdam sek (Ps 34:18)

3) THUNUAI GAWL LEH LUNGTHIM AH KINGAI TAWM

Thunuai gawl lehlungthim ah kingai tawm tawm ka hi Jesu ati ahi, (Mt 11:28) Pathian in michapo te adodal ah, kingai te alungset hi, (1 Pet5:5)

4) LUNGTHIM PHA LEH THIANGTHO,

Thagau thiangtho in achen chil thinlung Chu Jia gual hih ahi, thagau thiangtho panglo in Pathian in amalsomna na thiangtho hi apiang ngai puai, thiantho na hi su thiangtho pa panglo in nei thei ahi poi,

5) THINLUNG PHA LEH THAGAU

Thagau mi ihi takjet Leh Chu Tisa mi ihi puan (Gal6:1) Nangu thagau mite haw Tisa mite lenna gam chunglam a lenga thagau mi hi dingin Pathian in ei doi hi,

6) PATHIAN LUNGTHIM GUAL,

Mikhat in, lalpa lungthim gual ka DAWI hi tin apauchap hi, Tisa ahin Chu bukim na aum thei poi, thinlung luita hi Chei phat theile ahi puan, Pathian apat thinlung thak tak angai hi,

7) SUAL HUATNA NEI THINLUNG,

Sual hi huat thei na lampi khatbep aum hi Jia Chu sual delmang nawpna nei hi ahi, sual huat na lam ahin Pathian lam ah pan ding ahi, chapo nate haw hi Pathian mitmu achun thil kidak um tak ahi. Tisa mi thinlung chun sual angai na sek in, thinlung thak in suak a haw sek hi

8) PATHIAN HEPINA DIM THINLUNG:

(Mark12:30-33)thupiak lak sanghi alopi pen em? Lalpa la Pathian Chu la lungthim Zosia, la thagau Zosia, la hatna zosia in la hepi ding ahi, Pathian hepina a dim eima ki hiatmilna lungthim eipiak ima maw ahi, Pathian I hepi tak2 thei na dingin Jia hepina lung hi thagau thiangtho bep in ei pia thei hi

9) LIMNA, PAKNA, PATHIAN PAKNA:

(Eph5:19) pakna laa te, Pathian laa te, thagau lam laa te ah, kihe tua in Lalpa chu, lungthim ah lasa in thilgi kilawm in

10) CHUNGLAM AH KINGA LUNGTHIM:

(Kol3:1, 2)chutichun, Khrista tawh kaithaw ah la um tak uchun, chunglam a Pathian changlam ah kichu khrista umna thil umte chu hawl un, Chunglam a thil umte achun uh ngan, lei a thil umte achun kinga takiu in, Adik ma2 hi, langai natna lamte, langai tua nate, la dawigual te khawvel ah thil umte hilo in, chunglam ah thil umte achun kingak apawimaw hi.thagau adim te chun, tulai chanchin te sum leh pai hawl na lam te achun la lungthim nga ta puanla

11) KHRISTA IN ALUA DIM LUNGTHIM:

Thagau thiangtho in ama chanchin hilo Jesu chanchin bep agensek hi, Khrista achawihawi sek a, Khrista bep longal bangma dang in eisu lung awi thei puai.

HUN CHIASA CHANCHIN CHAWMKIM TE

- (1) RCG CEC Meeting date: 25th-September-2021 ni ah thulemsakna NO:5 na dungzui ah a chiata Tarik 9th-ctober-2021 Second Saturday ni khan RCG pumpi a dingah zing suankhat anngawl pauchapkhawmna RCG branch office Imphal mun in ala kinei in, ziani hin member mi 20 vel akichia khawm in, ziani ah Pauchap khawmna hun ah kimat dan ziagual hi ahi. Upa Lamshila Chairman R&MB in Hun hawanna Pauchapna a nei in, a zaw in Upa S.Haulal Moderator in vaidawanna thucha agen in, a zaw in Rev.Dr.Khupkam Vaiphei in Pauchap khawmna ma pui in, Pauchapna item 21 + 2 te aleng in Pathian kiangin tutzaw ahi in dak 2:00Pm vel in Hun khakna leh Thingpi nekthei a ding in Pathian kiangin latna leh kipak thugenna Upa Songlianhang Asst.Secretary in anei zaw in kipak leh lung muang chiat in innlam zuan in ka hung kikhen tau in ahi. Lopina lalpa ah hi zing ta hen. Amen. Chun, ziani hin kochuam mipi te hetding leh zui dingin Thagau thusuak khat Upa Kebon apat inle ahung kilang in ahi, zia thu chu ahile, RCG te loma hi seplo in akhul gam ta'n, louzau lak in RCG te lo mun chu a nak nungpen, a

chungnungpen in a um in, anuailam ah lozau te chu seplo in akui gam tan, zia a chun, zia lozau kul te haw chu eimau sepdingin a um hi ti thu ahi. Sepding umte sem zothei dingin Lalpa'n Damna leh Hatna ei pia ta hen.

- (2) A chiata Tarik 13th-Oct-2021 ni khan Leimakhong area ah um P.Gamhawi RCG te mun leh gam ah Pathian hona ding Biakin hawanna leh latna hun chu feltakin mat zaw ahi tai. Ziani ah Programme kimat ma deu in Thagau ah thu ahung pawt dungzui in Biakin gamgi khatvei vel na Upa zosian nei ahi, thu hung um dan ahile, Mission gam thu ah ginglotuten ahun suk buai lona dingun tina zia kin gamgi daltanna in vel ahi. Chun, ziani ah programme kimat dan ahile, Biakin hawna dinga Upa Songlianthang Vaiphei in ma pui in, Upa S.Haulal Moderator in Pa Pathian, Chapa Pathian leh Thagau Thiangtho Pathian min in Biakin kawt hawanna nei in, a zaw ah Biakin sungah mipi lut khawm in Pathian kiangah latthianna Rev.Dr.Khupkam Vaiphei in anei ahi zaw in kipak tak in Biakin kawt hawn daw leh lat daw ah um ta chu alawpna hun leh kipak thugenna hun ah Upa Lamshila in Hall ah ma pui in, Upa Soikam, Gotangkot in hun hawanna pauchapna anei zaw in, ahung khawmte vaidawanna thucha Pro/Pastor Lianboi in anei ah, a zaw in Tv.Veven in Pakna la sa in, a zaw in Upa Songlianthang Vaiphei in P.Gamhawi Biakin hung ki phu dawdan chanchin chawmkim in ahun gen in, a zaw in, Tv,Joel in Paknala asa'n, a zaw in ahung khawmte lakah kua hita le holim nuamte hun piakin a um ah, zia haw hun chu matzaw ahi phat in, Upa Jangthang Vice-Moderator in Kipak thugenna hun anei zaw in, Rev.Pauneu in, Hun khakna leh Thingpi nekthei a ding in kipak thugenna Pauchapnaa nei in Biakin kawt hawanna, latna leh alawpna hun chu buaina umlo in Pathian zal in kipak tak in mat zaw ahi tai. Lopina Lalpa I piau in ahi. Anuai ahin limlak khen khat takdaw ahi.

THE 44th REVIVAL CHURCH OF GOD

GAWTANGKOT BIAL JOINT KUMTAWP KHAWMPI

Report By: Tv. Veven Mualkon

A chia ta Date 29 - 31 OCTOBER, 2021 sunga khan RCG Gawtangkawt Bial ten Gawtangkawt vangkhua in kumtawp joint khawmpi chu Pathian mapui na jalin mat zaw ahitai.

Khawppi THUPI : Nite aphant taklo ziak in hun lemchang a tam thei pen in hawl zing in s(Eph. 5:16)

LAPI : Lungngaina sumpi khel akhin (LT.T.No 362)

Thugen ah pangte haw:

1. Pa Manggou (mumbai diploma)
2. Pro.Pastor Lianboi (Bialtu)
3. J.S.Minlun (B.D)
4. Pa Momoi (Bial RYF Chairman)
5. Rev. Pauneu (Bialtu)

kikhawmna sung ah Thagau Thiangtho pawlna changte :

1. Upa Kebon, 2. Upa Lalbawi, 3. Nu Chinneilian (GTK Hausapi), 4. Upanu (GTK), 5. Nu Chichin, 6. Nu Tingkim, 7. Nk. Winsky, chuleh a dang dang thagau malsawmna lim leh lam chawihawina le a kichawm hi. mipi zosia chawm in malsawmna nasatak le aki dawng hi.

Sunday zan in Rev.Pauneu Bialtu apat in Anthiang hawpna lawting tak in amang in, Hun zosia tawpna'n Rev. Pauneu Bialtu'n Benediction in hun khak na nei ahi tai.

H E T S A K N A

Mimal kua tawbang Kochuam sungah sawm ah khat piatheilo, chuleh Zion Thusuak lakman kum khat ah Rs,100/- chau ahi'n, kua taw bang hun pia nuam ten anuai ah RCG Bank account number leh Bank min chuleh IFSC number kipia a hin hun thawt thei inlau ti in ka hun hetsak ui. Editor Zion Thusuak Board.

Account Name: Revival Church of God
Account Number: 11343704608
Bank Name: State Bank of India
Bank Branch: Churachandpur main branch
IFSC: SBIN0006182
Branch Code: 6182
MICR Code: 795002504

ZION THUSUAK PATRON MEMBER TE

- 1) Pu Thangboi, Kohima
- 2) Nu Niangneu, HQ Veng
- 3) Nu Lily, T.Munjang
- 4) Nu Samboi Vanghoiphai
- 5) Pu GL Muana Neitham, Gochinkhup veng

Patron members kum 3 (thum) 2020 apat Rs 1,000/- hita ahi.
Life member dingin 5000/- ahi.

- Editor, Zion Thusuak Board

ZION THUSUAK**Collector/Magazine Agent:**

- | | |
|-------------------------|-----------------|
| 1. Tv. Joel | Hilltown |
| 2. Tv. Lalroman | T. Munjang |
| 3. Pa Paelim | Kangvai |
| 4. Upa Tongjang | Imphal |
| 5. Upa Khailiankham | Nakhuang |
| 6. Upa Manglun | S Elimphai |
| 7. Upa S Haupu | S Kanan |
| 8. Pa Mangminlun | Gawtangkawt |
| 9. Pa Khamneu | Jordanphai |
| 10. Tv. Hauginlian | Bewlahlane |
| 11. Nk. Paknu | Mualkon |
| 12. Tv. Khaimuan | Mantripukhri |
| 13. Pa Lenghau Phaltual | Vanghoiphai |
| 14. Pro Pastor Lianboi | P. Gamhawi |
| 15. Upa Lalla | L. Vaiphei Veng |



An ngawl pauchap ni limlak - Imphal



Biakin kawt hawna Moderador
Upa S Haulal



Upa ten P Gamhawi gamgi a vel
ding kuan



Biakin latna Rev. Dr. Khupkam
Vaiphei



Biakin hawna program ah
hung pang mipi te



Gawtangkot Bial Joint Khawmpi Imlalk

BOOK POST

7a,

RNI Read. No. 34293/80

Stamp

If undelivered please return to:

The Editor
ZION THUSUAK
RCG Head Office
Thangzam Road, Hilltown, Churachandpur, Manipur
PIN – 795128, P.O. Box No. 91
Email: rcgmission@gmail.com
Website: revivalchurchofgod.org
Contact: +91 9612652209 (Exe. Secy.)